

- इसरो नै अंतरग्रहीय आवास च जीन दे अनुकरण आस्तै लद्दाख च पैह्ला अनालॉग अंतरिक्ष मिशन शुरू कीता।
- भारत दा रक्षा निर्यात 2029–30 तोड़ी 50 ज्हार करोड़ रपे पुज्जी जाग—आखेआ रक्षा मंत्री राजनाथ सिंह होरें।
- दिल्ली एनसीआर च ब्हाऊ दी गुणवत्ता अज्ज बी बड़ी खराब आली श्रेणी च बनी दी ऐ।
- विदेश मंत्री डॉ. एस.जयशंकर होर अज्जै थमां आस्ट्रेलिया ते सिंगापुर दे 6 रोजा दौरा पर रौंहगन।
- ध्यारें दे मौसम दे चलदे भारती रेलवे अज्जै थमां कोई बाढ़ रेलगाड़ियां शुरू करा रदी ऐ।

<><><><><><>

ISRO Ladakh

भारतीय अंतरिक्ष अनुसंधान संगठन इसरो नै कल भारत दे पैहले अनालॉग स्पेस मिशन दी शुरुआत दी घोषणा कीती। लद्दाख केन्द्र शासित प्रदेश दे लेह च शुरू कीता गेदा एह मिशन भारत दा पैह्ला अनालॉग स्पेस मिशन ऐ। धरती पर गै अंतरिक्ष आंगर दा माहौल तैआर करियै इतिहास रचने दी इस कामयाबी कन्नै गगनयान मिशन ते मंगल ग्रह पर भेजने ते मुख्य दे अपना अंतरिक्ष स्टेशन बनाने दे महत्वकांक्षी मिशन च बी मदद थोग। इस अभियान गी आका स्पेस स्टूडियो लद्दाख युनिवर्सिटी ते आई.आई.टी बाम्बे कन्नै मिलियै विकसित कीता गेआ ऐ। इसरो नै अपने सोशल मीडिया प्लैटफार्म “एक्स” पर लिखेया ऐ ते भारत दा पैह्ला अनालॉग अंतरिक्ष मिशन लेह च शुरू होआ।

<><><><><><>

Rajnath Singh

रक्षा मंत्री राजनाथ सिंह होरें आखेआ ऐ जे भारत दे आत्म निर्भर अभियान दे अपेक्षित नतीजें हासल होआ रदे न। बरें 2029–30 तगर मुख्य दा रक्षा निर्यात 50 ज्हार करोड़ रपे तगर पुज्जने दी मेद ऐ। भारतीय प्रौद्योगिकी संस्थान कानपुर दे 65में स्थापना दिवस समारोह गी संबोधत करदे होई सिंह होरें नोजवानें थमां प्रधानमंत्री नरेन्द्र मोदी हुंदे विकसित भारत दे नजरियै गी साकार करने च स्वदेशी तकनालोजी आली क्षमता गी विकसित करने दा आह्वान कीता। रक्षा मंत्री होर युवा इंजीनियरें थमां अपनी क्षमता दा इस्तेमाल करदे होई तकनीकें गी विकसित करने ते मुख्य दी प्रगति च योगदान देने लेई गलाया। उनें आखेआ जे आत्म निर्भरता दा लक्ष्य हासल करने दे सरकार दे जतन पूरी चाल्ली सफल होआ रदे न। 10 बरें पैहले मुख्य दा रक्षा निर्यात लगभग 6 सौ करोड़ रपे हा जेहड़ा हुन 21 ज्हार करोड़ रपे दे पार होई गेआ ऐ। उनें एहदे 2029–30 तगर पुज्जने दी मेद जाहर कीती।

<><><><><><>

Bhaiya Dooj

धन त्रोदषी कन्नै शुरू होए दे देयाली समारोह दे कार्यक्रम अज्ज भइया दूज जिसी “टिक्का” बी आखेआ जंदा ऐ, दे कन्नै गै सम्पन्न होआ रदे न। अज्ज दे दिन बैहनां अपने भ्राएं गी टिक्का लाइयै उंदी लम्मी उमरी लेई प्रार्थना करदियां न। भ्राह बी म्हेषां बैहनें दा साथ देने ते उंदी रक्षा दा वचन दिंदे न। बैहन—भ्राह दे बष्कार अज्ज दे खास ध्याड़े तोहफे दा आदान—प्रदान बी होंदा ऐ। बैहन—भ्राएं दे खास रिस्ते गी होर गुढ़ा बनाने आला एह ध्यार देयाली दे त्रीए रोज मनाया जंदा ऐ।

<><><><><><>

Buddhist Summit

संस्कृति मंत्रालय अंतर्राष्ट्रीय बुद्धिस्ट कन्फेड्रेशन कन्नै रलियै नमीं दिल्ली च 5 ते 6 नवम्बर गी पैह्ला एषियाई बुद्धिस्ट सम्मेलन दा आयोजन करने जा रदा ऐ। इस सम्मेलन दा विशय सार ऐ—“त्वसम वी ठनककीं वीउउं पद जेतमदहजीमदपदह णं” यानि एषिया गी मजबूत बनाने च बुद्ध धम्मा दी भूमका। राष्ट्रपति द्रौपदी मुर्मू होर इस कार्यक्रम च मुख्य परीहने दे तौर पर शिरकत करने दी मेद ऐ। इस सम्मेलन च संघ नेता, शिक्षाविद्, विशेषज्ञ ते एषिया थमां बौद्ध धर्म ते रिवायतें कन्नै जुड़े दे लोक हिस्सा

लैंगन ते आपसी गल्लबात, आपसी समझ गी बेहतर बनाने ते बौद्ध समुदाय गी पेश आवा'रदी चुनौतिएं बारे हल बी कड़डे जांगन।

<><><><><><>

Delhi Pollution

दिल्ली दी ब्हाऊ दी गुणवत्ता स्तर गी केन्द्रीय प्रदूषण नियंत्रण बोर्ड सीपीसीआर नै खराब श्रेणी च रखेआ ऐ। दिल्ली दी ब्हाहू दी गुणवत्ता सरबन्धी सूचकांक 6 बजे 361 दर्ज कीता गोआ। मौसम विभाग ने दिल्ली ते एनसीआर अगले 2 थमां 3 दिनें तगर बडलै ते रातीं च धुंध ते हल्का कोहरा छाए दे रौहने दी मेद जाहर कीती गई ऐ।

<><><><><><>

IMD

मौसम विभाग नै अज्ज तमिलनाडू, पुडुचेरी, कराईकल, केरल ते माहे च तूफान ते बिजली चमकने दे कन्नै तेज बरखा दी संभावना जाहर कीती ऐ। अगले 4 दिनें दरान उत्तर-पच्छिम ते पूर्वी भारत च घट्टोघट्ट ते बद्धोबद्ध तापमान च 2 थमां 3 डिग्री सैल्सियस दी गिरावट औने दी मेद ऐ। इस म्हीने दी 5 तरीक गी अंडमान ते निकोबार द्वीप समूह च बी तेज बरखा दी संभावना ऐ। दिल्ली ते एनसीआर च अगले 2-3 दिन च बडलै ते रातीं च धुंध ते हल्का कोहरा बने रौहने दी बी मेद ऐ।

<><><><><><>

Startup

भारतीय नवाचारे, स्टार्टअप नै मजूदा ब'रे पैहले 10 म्हीने च 12.2 बिलियन डॉलर दा आंकड़ा पार करी लैता ऐ। एह राषि ब'रे 2023 च जुलाई गेदी कुल राषि थमां बी मती ऐ। स्वदेशी नवाचार अक्टूबर म्हीने च इक बिलियन डॉलर दा आंकड़ा पार कीता ऐ। पिछले म्हीने प्रधानमंत्री नरेन्द्र मोदी हुंदी अध्यक्षता च केन्द्रीय मंत्रिमंडल नै उभरदे अंतरिक्ष क्षेत्र आस्तै इक ज्हार करोड़ रपे दी रकम गी मंजूरी दिक्ती। निवेश दे मौके ते रपे पैसे सरबन्धी जरूरते गी 150 थमां 250 करोड़ रपे फही ब'रे तगर बधाया जाई सकदा ऐ।

<><><><><><>

Dr. Jaishankar

विदेश मंत्री डॉ. एस.जयशंकर होर अज्जै थमां आस्ट्रेलिया ते सिंगापुर दी 6 दिनें दी यात्रा पर रौहगन। इस दरान विदेश मंत्री ब्रिस्वेन जांगन ते आस्ट्रेलिया च भारत दे चौथे वाणिज्य दूतावास दा उद्घाटन करगन। ओह कैनबरा च आस्ट्रेलिया दी विदेश मंत्री पेन्नी वॉंग हुंदे कन्नै विदेश मंत्री स्तरीय रुपरेखा संवाद दी 15मीं बैठक दी सह-अध्यक्षता करगन। विदेश मंत्री आस्ट्रेलिया दे संसद भवन च दुए रायसीना डाउन अंडर दे उद्घाटन सत्र गी संबोधत करगन। डॉ. जयशंकर आस्ट्रेलिया दे नेताएं, सांसदें, प्रवासी भारतीय समुदाय दे सदस्य, कारोबारी जगत दे प्रतिनिधिएं, मीडिया ते होर दुए लोकें कन्नै गल्लबात करगन। यात्रा दे दुए गेड़ च डॉ. जयशंकर 8 नवम्बर गी सिंगापुर जांगन। ओह 8 गोलमेज गल्लबात गी संबोधत करगन। मंत्री होर दौनें मुखें बष्कार करीबी साझेदारी दी समीक्षा ते दपक्खी सरबन्धें गी होर मजबूत करने दे तौर तरीके बारे सिंगापुर दे नेताएं कन्नै बैठक करगन।

<><><><><><>

Special Trains

भारती रेलवे ध्यारें दे मौसम दे चलदे खास रेलगड्डियां चला'रदी ऐ। तकरीबन 20 खास रेलगड्डियां अज्ज दिल्ली-एनसीआर थमां देश दे बक्ख-बक्ख हिस्से लेई रवाना होंगन। एह खास रेलगड्डियां दरभंगा, रांची, पटना, कटरा, मुजफ्फरपुर, बलिया, कामाख्या ते आजमगढ़ तोड़ी चलाइयां जांगन।

<><><><><><>

Amit Shah

बीजेपी दे वरिष्ठ नेता ते केन्द्री गृह मंत्री अमित शाह होर झारखंड विधानसभा चुनाएं आस्तै अज्ज पार्टी दा घोशणा पत्र संकल्प पत्र जारी करगन। शाह होर धालमूमगढ़ घाटशिला, हजारीबाग च बरकट्टा ते चतरा च सिमारिया थाहरें पर अज्ज चुनां रैलिएं गी संबोधत करगन। केन्द्री मंत्री होर अपने 2 दिने दे झारखंड दौरे आस्तै कल रातीं पुज्जे हे। शाह हुंदा राज्य बीजेपी नेताएं कन्नै चुनाएं दी तैआरिएं दी समीक्षा करने दा कार्यक्रम बी ऐ।

Home Minister

भारत नै कनाडा च बने सुरक्षा ते राष्ट्रीय सुरक्षा पर स्थाई समिति दे सामने कनाडा दे उपमंत्री डेविड मोरिसन हुंदे आस्सेआ केन्द्रीय गृहमंत्री अमित शाह हुंदा जिक्र करने पर सख्त ऐतराज जाहर कीता ऐ। विदेश मंत्रालय नै कल संजा कनाडा दे उच्चायोग दे प्रतिनिधि गी तलब कीता ते भारत दा विरोध दर्ज करोआया। विदेश मंत्रालय दे प्रवक्ता रंधीर जयसवाल होर नमीं दिल्ली च इक संवाददाता सम्मेलन च दस्सेआ जे ओटावा च 29 अक्टूबर गी स्थाई समिति दी कारवाई दे मामले च इक कूटनीतिक परिपत्र बी सौंपेआ। उनें आखेआ जे कनाडा दे उच्च अधिकारिणं अंतर्राष्ट्रीय मीडिया दे सामने जानी-बुझियै जेह्ड़े खुलासे कीते न ओह् भारत दे इस नजरियै दी पुष्टि करदे न जे एह् मजूदा कनाडा सरकार दा राजनीतिक एजेंडा ऐ।